

- 1^r Mancher fröwt sich / vff frömbde hab
- 2^r Wie er vil erb / vnd trag zû grab /
- 3^r Die mit sym gbeyn nusß werffen ab



von hoffnung vff erben.

- 1 Eyn narr ist / wer sich dar vff spitzt
- 2 Das er eyns andern erb besitzt
- 3 Oder für jn kum / jn den rott
- 4 Syn güt / pfründ / ampt / besitz noch dott

5 Mancher eyns andern dott sich fröwt
 6 Des end / er nyemer me beschowt
 7 Hofft eynen tragen hyn zûm grab
 8 Der mit sym gbeyn würfft bieren ab /
 9 Wer hoffet vff eyns andern dott
 10 Vnd weiß nit / wann syn sel vß gat
 11 Der selb den esel dût beschlagen
 12 Der jn gen narrenberg würt tragen /
 13 Es sterben jung / starck frölich lüt
 14 So fyndt man ouch vil kelber hüt
 15 Es gat alleyn nit / über die küg
 16 Eym yeden syn armût benûg
 17 Vnd bgâr nit / das es grösser werd
 18 Eyn wilder vmblouff ist vff erd
 19 Bulgarus erbt ouch synen sûn
 20 Des er nye hat gehofft zû thûn
 21 Pryamus sach syn kynd all sterben
 22 Die er hofft / sie wurden syn erben
 23 Absolon syns vatters tod nach schleych
 24 Vnd reycht syn erbteyl an der eych
 25 Manchem eyn erb würt über nacht
 26 Vff das / er vor nye hat gedacht
 27 Mancher eyn erben überkunt
 28 Dem lieber wer / jnn erbt eyn hundert /
 29 Nitt yedem gatt noch hoffens won
 30 Als Abraham / vnd Symeon
 31 Loß vöglin sorgen / wann gott will
 32 So kumbt das glück / zytt / end / vnd zyl /
 33 Das best erb / ist jm vatter landt
 34 Do wir hyn hoffen alle sandt
 35 Gar wenig stoßt es doch zûr handt

q6r

7 zûm GW5046 GW5047] zû GW5041 12 gen GW5046 GW5047] gôn GW5041 21 Pryamus GW5041 GW5046] Pyramus GW5047